



Komiteet za normalizaciju N/FSBiH odlučio

## Klubovi bez kotizacije

► 46. strana

**OSLOBODENJE**  
SARAJEVSKO IZDANJE

utorak, 26. juli 2011. godine



## U Sarajevu započeo trodnevni medicinski skup



Sa jučerašnjeg otvorenja u Sarajevu



Foto: D. ĆUMUROVIĆ

# Prvi euro-azijski forum o hroničnim ranama

Udruženja za rane BiH i Republike Turske zajednički organizuju međunarodni forum sa prezentacijom najnovijih dostignuća u prevenciji, dijagnosticiranju i liječenju hroničnih rana

Prvi euro-azijski forum Udruženja za rane u BiH, na kojem će biti ukazano na prevenciju, dijagnosticiranje i liječenje hroničnih rana kod bolesnika uz primjenu najnovijih metoda tretmana ovih oboljenja, biće održan u naredna tri dana u Sarajevu. Udruženje za rane u BiH, koje je članica Evropskog udruženja za rane, ovaj trodnevni skup organizuje u saradnji sa Udruženjem za rane Republike Turske.

Na jučerašnjem svečanom otvorenju, upriličenom u hotelu Hollywood na Ilidži, dr. Jasmina Begić - Rahić, predsjednica bh. udruženja, koje je registrovano 2009. godine, je kazala kako se skup prvi put organizuje u našoj zemlji na osnovu Sporazuma, koji su potpisali Ministarstvo civilnih poslova BiH i Ministarstvo zdravlja Republike Turske u maju ove godine.

"Cilj organizovanja Forumu i saradnje dva udruženja je uspostavljanje boljih komunikacija ljekara, medicinskih stručnjaka i profesionalaca u smislu razmjene is-

kustava jer Udruženje za rane Republike Turske ima više iskustva i sa dužim je stažom. U sklopu Udruženja smo organizovali i prvu međunarodnu ljetnu školu za rane, koja će postati tradicionalna. Kao vid edukacije i saradnje, a ove godine to činimo zajedno sa Fakultetom za zdravstveni studij, pratićemo novine i savremene metode u liječenju hroničnih rana. Cilj nam je da smanjimo troškove društva i poboljšamo zdravstvenu njegu i zaštitu koju možemo pružiti našim građanima na opšte zadovoljstvo te poboljšati kvalitet života pacijenata i njihovih porodica", naglasila je dr. Begić - Rahić.

Prof. dr. Dijana Avdić, dekanesa Fakulteta zdravstvenih studija Univerziteta u Sarajevu, je kazala kako ova obrazovna ustanova školuje medicinske profesionalce sa širokim spektrom djelovanja.

"Zajednički radimo ovaj projekat. Mi kao institucija potpomažemo program cjeloživotnog učenja, koje je sve više praksa,


prepoznatljivo i certifikovano u evropskim zemljama. Prepoznali smo da takve kadrove treba da školujemo", naglasila je ona.

Tokom jučerašnjeg Forumu prim. dr. med. Fahrudin Kulenović, predsjednik Ljekarske komore Kantona Sarajevo je kazao da je "kao građanin Sarajeva zadovoljan da se ovakav interkontinentalni forum o ranama održava u BiH i Sarajevu".

"Baš u Sarajevu je bilo slavni vidara, ranara, koji su se bavili ranama, pa sve do danas, naših ljekara, koji će zajedno sa prijateljima iz Turske predstaviti najvažnije novine u modernom medicinskom tretmanu rana raznog porijekla", rekao je dr. Kulenović, koji je, ovom prilikom, govorio o etičkim vodiljama u medicinskoj praksi.

Učesnicima Prvog euro-azijskog forumu o hroničnim ranama danas će se obratiti i prof. dr. Bulent Erdogan, predsjednik Udruženja za rane Republike Turske.

Mr. BABIĆ



## U Austriji 20 centimetara snijega

U višim predjelima Austrije, tačnije na planinama gdje se nalaze poznati skijaški centri, napadao je snijeg čija visina negdje iznosi i 20 centimetara, a policija je uvela obaveznu upotrebu zimske opreme. Naime, na planinama u pokrajinama Koruška, Salcburg i Štajerska, gdje se nalaze poznata skijališta, palo je više centimetara snijega pa je tako na planinskom vrhu Sonblik u nedjelju snježni pokrivač dostigao visinu od 20 centimetara. Prema podacima policije, saobraćajnice su morale da čiste zimskom mehanizacijom i uvedena je obaveza vožnje s lancima. Inače, snijeg je posljednji put pao u julu 2007. godine, dok je 2004. zabilježena rekordna visina od 16 centimetara snježnog pokrivača.

## Malta dozvolila razvod braka

Malteški poslanici usvojili su jučer zakon kojim se dozvoljava građanima te katoličke zemlje da se razvedu u svojoj državi. Maltežani su do sada mogli da se razvedu samo u inostranstvu, pošto je Malta bila jedina zemlja EU koja nije imala zakon o razvodu braka. Za zakon su glasala 52 poslanika, 11 protiv, dok je njih petoro bilo usdržano. Zakon će stupiti na snagu u oktobru, kada se očekuje da ga potpiše predsjednik, prenio je AP. Na referendumu 28. maja, skoro 53 posto učesnika glasalo je za legalizaciju razvoda braka.

## Ubici Hranta Dinka 23 godine zatvora

Istanbulski sud za maloljetnike osudio je juče glavnoosumnjičenog za ubistvo jermenskog novinara Hranta Dinka na 22 godine i 10 mjeseci zatvora, prenose agencije. Sudsko vijeće zaključilo je da je optuženi Ogun Samsat koji je u vrijeme zločina imao 17 godina kriv za ubistvo s predumišljajem i nelegalno posjedovanje oružja.

Dink je bio urednik dvojezičnog nedjeljnika na turskom i jermenskom, a ozlojedio je nacionaliste članicama o turskom genocidu protiv Jermena 1915. godine. Ubijen je 2007. godine usred bijela dana na izlasku iz svoje redakcije u Istanbulu. Prethodno mu je više puta prećeno smrću.

Samsatu još treba da bude suđeno po odvojenoj optužnici za terorizam, i mogao bi dobiti dodatnu kaznu do 16 godina zatvora. Turski sud je u junu osudio dvojicu vojnih oficira na šest godina zatvora zato što su ignorisali obavještajne podatke koji su možda mogli da spriječe Dinkovo ubistvo.

## POSLEDNJE VIJESTI

**UBIO GA VO** - Milosav Droca (1939), dovezen je jučer mrtav iz Goražda iza 14 sati u KCUS. Kako saznajemo, podlegao je nakon što ga je ubo vo. "Kad su ga dovezli, konstatovali smo smrt", kazala je Biljana Jandrić, glasnogovornica, KCUS-a jučer za Oslobođenje.

**POŽARI U ALBANIJI I GRČKOJ** - Požar iz Albanije proširio se na grčku teritoriju u regionu grada Janina, u zapadnom dijelu zemlje i brzo je zahvatio teško dostupne planinske oblasti, javila je grčka državna agencija ANA-MPA, prenosi Srna. U gašenju požara učestvuju četiri aviona i helikopter, kao i veći broj vatrogasaca, a za sada nisu ugrožena naseljena mjesta. Prema medijima, jak vjetar otežava gašenje požara.

### BERLIN: U STANU PRONAĐENO ŠEST

**MRTVIH OSOBA** - Policija je u jednom stanu u Berlinu pronašla šest mrtvih osoba - majku, njeno četvero djece i jednog muškarca. Glasnogovornik policije u Berlinu rekao je juče da je uzrok smrti članova porodice još pod istragom. On je dodao da su pronađena tijela 40-godišnjeg muškarca, njegove 27-godišnje supruge i četvero djece u stanu u istočnom predgrađu Kopeniku, nakon što su provalili u stan.

## Helsinška komisija za sigurnost i saradnju

# BiH u središtu pažnje

Pred Helsinškom komisijom za sigurnost i saradnju u Evropi (United States Commission on Security and Cooperation in Europe) održat će se danas u Washingtonu saslušanje o trenutnoj situaciji u Bosni i Hercegovini. Briefing će se održati pod nazivom "BiH u središtu pažnje: Prepreke za napredak i preporuke za reakciju međunarodne zajednice", saopćeno je iz US Helsinške komisije iz Washingtona.

Učesnici diskusije su Clifford Bond, bivši američki ambasador u Bosni i Hercegovini, i potpredsjednik Američkog univerziteta u Bosni i Hercegovini, zatim Kurt Bassuener, viši stručni saradnik Vijeća za demokratizaciju politika, kao i Nida Gelazis, viši stručni saradnik Programa evropskih studija Centra "Woodrow Wilson".

Kako se navodi u saopćenju, politička situacija u BiH se pogoršala u posljednjih nekoliko godina. Od oktobarskih izbora prošle godine, političke stranke nisu u stanju postići dogovor o formiranju nove vlasti na državnoj razini. Politike u zemlji obilježavaju povećane nacionalističke retorike, što ponekad pred-



Clifford Bond će podnijeti izvještaj

stavlja prijetnju za mir, stabilnost i teritorijalni integritet zemlje. Briefingom će se nastojati locirati izvori političkih zastoja i ispitati eventualni smjer aktivnosti međunarodne zajednice, navodi se u saopćenju Američkog univerziteta u Bosni i Hercegovini.